

Հ Ա Ն Գ Ի Ս Տ

Տ. ՊԱՐԳԵՎ ԵՊԻՍԿՈՊՈՍ ՎՐԹԱՆԵՍՅԱՆԻ

Հոկտեմբերի 18-ի գիշերը, Երուսաղեմի հայոց Սրբոց Հակոբյանց միաբանության անդամ գերաշնորհ Տ. Պարգև եպիսկոպոս Վրթանեսյանը, սրտի արատի պատճառով, մահացավ հանկարծահաս կերպով:

Հանգուցյալ Տ. Պարգև սրբազանի անակնկալ մահով Սրբոց Հակոբյանց միաբանությունը կորցնում է իր բարի և նվիրված միաբաններից մեկին:

Հուսահոգի սրբազանը ծնվել է 1905 թվականին Փոքր Ասիայի Պալքեսիր քաղաքում, որտեղ և ստանում է իր նախնական կրթությունը, իսկ Կոստանդնուպոլսի Կենտրոնական

Վարժարանում՝ միջնակարգ կրթությունը, 1910—1922 թվականներին: Աշակերտում է նաև վերաբացված Արմաշի Դպրեվանքին 1923—1924 տարիներին: 1925 թվականին ընդունվում է Երուսաղեմի նորաբաց Ժառանգավորաց վարժարանում և ավարտելով այն, 1930 թվականին ձեռնադրվում է Կուսակրոն բահանա: Այնուհետև Երուսաղեմի Սրբոց Հակոբյանց վանքում բարեխղճությամբ վարում է



վանական-վարչական պաշտոններ: 1930—1934 թվականներին վարում է Ս. Աթոռի ավագ թարգմանի պաշտոնը: 1936—1939 թվականներին նշանակվում է Ս. Աթոռի հյուրընկալ և հանդերձապետ: Ապա մինչև 1939 թվականը վարում է Ս. Հարություն տաճարի տեսչությունը:

1940—1956 թվականներին անդամակցում է Ս. Աթոռի Տնօրեն ժողովին, միաժամանակ կատարելով վանքի գանձապետի պաշտոնը:

Հուսահոգի սրբազանը ունեցել է նաև գրական, բանասիրական վաստակ, հեղինակն է «Ս. Հարություն տաճարի մեջ Ս.

Կուսավորիչ եկեղեցին», «Եղիշն պատմագիր և Վարդանանց պատերազմը» գրքերի: Վերջին տարիներին ձեռնհասորեն նա էր պատրաստում Սաղիմական օրացույցները:

Տ. Պարգև սրբազանի անունն ու հիշատակը միշտ թարմ կմնան Ս. Աթոռի միաբանության և հավատացյալ ժողովրդի սրտերում:

«Յիշատակն արդարոց օրհնութեամբ եղիցի»:

